

私藏應禁軍器

圖利私造線槍價賣與人打雀

西城察院 移送王四私造線槍一案。查王四開設鐵鋪，向係打造官用鳥槍。該犯希圖獲利，私造線槍十餘桿。查驗線槍係挺長塘細，僅可灌貯鐵砂，堪以打雀。與軍械鳥槍身短塘寬，能容鉛丸者不同。王四應比照私造鳥槍杖一百，枷號兩個月。每一件加一等例，免其枷號。並免按件加等，將該犯擬杖一百，折責發落。賣槍錢文入官。未賣線槍全行查銷。並令提督衙門嚴禁鋪戶毋許造賣。安二欲圖打雀買得線槍一桿，攜回點放試驗，即被拏獲。應比依鳥槍向城市有人居止宅舍施放者，雖不傷人例，笞四十。道光六年直隸司現審案

東三省旗民用鳥槍毋用查禁

奉天司 查本年二月內，兩江總督具奏民間私藏鳥槍請限收繳一摺。欽奉上諭“通行飭禁，立限呈繳。如逾限不繳，於按律擬杖之外，分別再加枷號。”當經本部通行各直省督撫、將軍一體欽遵辦理在案。茲據該將軍以盛京等處向無具奏私藏鳥槍之案，嗣於乾隆六十年，本部題准行令，該將軍於每年十月底咨報，以便彙核辦理。當經該將軍恭錄乾隆五十四、五等年欽奉“清”字上諭二道，咨請部示。復經本部行令，欽遵上諭：“毋庸查禁”在案。此次復奉諭旨，可否遵照前旨毋庸查禁，抑或欽遵現奉諭旨辦理之處，聽候

部覆。等因。恭查乾隆五十四年十二月初一日。奉上諭：“據科靈阿奏一年之內並無私造鳥槍等事照例彙奏，等語。督撫等年終彙奏稽察私造鳥槍一事，原屬具文。將軍、副都統並無民社之責。亦於年終彙奏，尤屬虛應故事。況旗人能打造鳥槍甚屬美事。朕尚嘉之，又何禁之有？將此交東三省駐防各處將軍，副都統等。嗣後年終不必彙奏禁止私槍之事。”等因。欽此。又乾隆五十五年十二月十一日，奉旨：“據宜興等奏，奉天府所屬州縣居民人等並無私用鳥槍之處，查明彙奏，等語。東三省人等俱賴打牲爲業，不但不可禁止私用鳥槍，卽居民之私用槍者，亦斷不能盡行查禁。各督撫等年終彙奏俱係虛應故事。前業經降旨著將軍、副都統等將禁止私用鳥槍年終彙奏之例停止。宜興等未見此旨乎！況不查旗人私用鳥槍，只禁止民人私用鳥槍，其事亦不可行。宜興等仍照例將查禁私用鳥槍之處彙奏，甚屬拘泥不曉事體。著將宜興等申飭。”欽此。查各省居民私造、私藏鳥槍固應欽遵現奉諭旨辦理。而盛京等處旗民私用鳥槍，既於乾隆五十四、五等年欽奉諭旨毋庸禁止。且於六十年，本部題令於每年十月底咨報彙辦時，曾經該將軍恭錄欽奉諭旨二道。咨請部示，卽經本部行令欽遵上諭，毋庸查禁在案。現在自仍應欽遵前奉諭旨毋庸查禁，相應咨覆盛京將軍，並通行吉林、黑龍江暨奉天府尹一體遵照。道光二年說帖

造賣火繩如歸官用免其禁止

山西司 查律載，民間私人有馬甲、傍牌、火筒、火礮、旗纛、號帶之類應禁軍器者，一件杖八十，每一件加一等。私造者加私有罪一等。罪止杖一百流三千里。又例載，私造鳥槍、杖一百。又：私販硫黃五十觔、焰硝一百觔以上者，杖一百徒三年。合成火藥賣與鹽徒者，發近邊充軍。各等語。此案山西民人徐三向在甘肅開鋪。因來京向開雜貨鋪之崔發潮販賣火繩。崔發潮向胡二承買轉賣給徐三，欲運往寧夏，賣給滿城兵丁。至山西寧鄉縣地方被官役查